

'Terima kasih, saya sedar banyak habis masa bekerja' - ucapan Tun M buat isteri
Astro Awani
12 Julai 2019
Afiq Ariffin,

KUALA LUMPUR: Seperti yang anda sedia maklum isteri kepada Perdana Menteri, Tun Dr Siti Hasmah Mohd Ali telah pun mencecah usia genap 93 tahun hari ini.

Tarikh istimewa 12 Julai ini telah membawa kepada ribuan ucap selamat dan doa disampaikan oleh rakyat Malaysia di seluruh platform media sosial sejak awal pagi ini.

Dalam ribuan ucapan yang diterima, tidak ketinggalan menyampaikan ucapan kepada Dr Siti Hasmah ialah suaminya, Tun Dr Mahathir Mohamad.

Dalam entri yang dimuat naik di media sosial miliknya sekitar jam 10.30 malam, Dr Mahathir mengucapkan terima kasih kepada isterinya kerana memahami tanggungjawabnya sebagai pemimpin negara.

“Selamat Hari Lahir kepada isteri saya, Hasmah. Terima kasih kerana sentiasa bersama dan menemani saya.

“Saya sedar masa saya banyak dihabiskan dengan bekerja, lebih-lebih lagi sekarang kerana itu saya menghargai kesabaran isteri saya. Semoga diberkati Allah sentiasa,” tulis Dr Mahathir di laman Facebook dan Instagram.

Rata-rata netizen dilihat turut sama gembira dan memberikan respons terhadap entri yang dibuat Dr Mahathir, menyatakan beliau sangat bertuah kerana memiliki isteri sebaik Dr Siti Hasmah.

“Tun sangat bertuah mempunyai isteri seperti Tun Dr Siti Hasmah. Dia satu dalam sejuta! Selamat hari lahir Tun Dr Siti Hasmah,” tulis Kumari Indira.

“Semoga kedua-dua Tun Dr Mahathir & Tun Dr Siti Hasmah dirahmati Allah s.w.t dengan diberikan kekuatan untuk saling melengkapi dalam membina semula kecemerlangan negara,” tulis Hashim Suboh.

“Happy birthday Tun dan isteri. Semoga Allah memelihara keimanan dan kesejahteraan sentiasa buat Tun berdua,” tulis Salwa Khalid.

Dr Siti Hasmah yang berusia 93 tahun hari ini sekali gus meletakkan beliau sebagai isteri kepada pemimpin tertua di dunia.

Pada 10 Julai lalu, Dr Mahathir menyambut ulang tahun kelahiran beliau yang ke-94.

Jika anda belum berkesempatan untuk mengucapkan Selamat hari Lahir kepada Perdana Menteri, anda boleh sertakan ucapan anda di pelbagai platform media sosial Astro AWANI dengan hashtag #TunSiti93.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/terima-kasih-saya-sedar-banyak-habis-masa-bekerja-ucapan-tun-m-buat-isteri-212541>